

HARANGVE  
FVNEBRE

DE MONSIEVR LE DVC  
DE CHASTILLON.



HARANGUE

EVER

DE CHASTILLON

M. DE XLIX



# HARANGVE FVNEBRE,

PRONONCEE AVX OBSEQVES  
DE MONSIEVR

LE DVC DE COLIGNY,

FAITES A ST DENYS LE SAMEDY

XX. FEVRIER M. DC. XLIX.

en presence de Monseigneur

LE PRINCE.

*Par le R. P. FAVRE Cordelier, Docteur en  
Theologie de la Faculté de Paris, & Predi-  
cateur de la Reyne Regente.*



A PARIS,

Chez FRANÇOIS PREVVERAY, grande rue  
de la Bretonnerie, proche la porte S. Jacques.

---

M. DC. XLIX.

*Avec permission.*



HARANGUE

F V N E B R E .

PRONONCEE AUX OBSÈQUES

DE MONSIEUR

LE DUC DE COLIGNY.

FAITES A ST DENYS LE SAMEDI

XX. FEVRIER M.DC.XLIX.

en présence de Monseigneur

LE PRINCE

M. R. P. F. A. N. R. E. Cardinal, Docteur en

Théologie de la Faculté de Paris, &c. &c.

Chancelier de la Reine Régente.



A PARIS,

Chez FRANÇOIS PREVIERAY, graveur

à la Bibliothèque du Roi, sous le Vestibule.

M. D. C. XLIX.

chez Previeray





HARANGVE FVNEBRE  
PRONONCEE AVX OBSEQVES  
DE MONSIEVR  
LE DVC DE COLIGNY,  
FAITES A SAINT DENYS, EN  
PRESENCE DE MONSEIGNEVR  
LE PRINCE.

*Consummatus in breui expleuit tempora multa. Sap. 4.*  
Il a vescu long-temps, quoy qu'il ait bien-tost finy  
sa course. C'est ce que Salomon dit du Iuste au liure de  
la Sageſſe.



MONSEIGNEVR,

La couſtume de meſler les Haran-  
gues Funebres, dans la Pompe des  
funerailles, n'eſt introduite dans l'E-  
gliſe, que pour ſoulager les morts,  
ou bien pour conſoler les viuans. C'eſt pourquoy,  
MONSEIGNEVR, ſi pour voſtre conſolation vous at-  
tendez que j'employe dans celle-cy, les loüanges du

B

944.03

M475m

No. 1606

817474



DUC DE COLIGNY; agréez que pour le soulagement de son ame, ie vous demande des larmes & des prieres. En cela ie ne vous demande rien que l'Escripture ne vous conseille. *In mortuum produc lachrymas*, & vous n'exige rien de moy que la mesme Escripture ne me commande, *lauda post mortem*.

Quand ie considere le Duc DE COLIGNY par les illustres conditions de sa Race, par les rares vertus de sa glorieuse vie, & par les circonstances de sa mort véritablement Chrestienne; ie ne doute point que ses merites singuliers n'exigent des loüanges extraordinaires; Je crains mesme que la foiblesse de mon art, desnüé du fonds de l'esprit & du temps, necessaire pour trauailler à cet ouurage ne luy face tort, & ie me fusse sans doute dispensé de l'entreprendre, si ie n'auois pensé, qu'ou la desobeïssance seroit vn crime, la temerité peut passer pour vne espece de vertu. Mais quand ie le regarde par les miserables conditions de l'infirmité humaine, quand ie le considere comme vn pecheur obligé de rendre conte de toute sa vie, deuant la face de ce redoutable Iuge, des viuants & des morts; que ie me souuiens que sa mort precipitée ne luy a pas donné tout le temps, qu'il eut bien desiré pour faire penitence; Et que ie sçay par vn Oracle qui ne peut mentir, qu'il faut expier ses crimes dans cette vie ou dans l'autre, le desir passionné de le soulager m'oblige de vous demander des larmes; mais des larmes proportionnées à ses merites, & à l'affection que vous luy portiez. Pleurez donc, Chrestiens, & ie parleray; ainsi nous rendrons vous & moy ce que nous deuons à la memoire du Duc de Coligny.



Quand les hommes seroient les artisans de leur propre felicité, & qu'ils disposeroient souuerainement de leur fortune ; Je ne crois pas qu'ils puissent raisonnablement desirer quelque chose au delà d'une Illustre naissance, d'une vie glorieuse, & d'une mort veritablement Chrestienne ; car la Naissance illustre, apporte à l'homme tous les auantages du sang ; la vie glorieuse luy acquiert le fruit de toutes les vertus, & la mort Chrestienne le met en possession d'une eternelle felicité ; Ainsi dans le cours de peu d'années, il possede la fleur de la noblesse, le pris du merite, & tous les priuileges de la grace : & passe dans une carriere, dont les principes sont glorieux, le progresz admirable, & la consommation bien-heureuse. Et cela s'appelle selon Dieu & selon le monde, naistre, viure, & mourir heureux, *Iste moritur felix*. GASPARD DUC DE COLIGNY & Seigneur de Chastillon, est nay, à vescu, & est mort de la sorte : Il est nay dans une des plus nobles & des plus anciennes Maisons de France, il a vescu de la plus glorieuse maniere, & il est mort tres-Chrestienement ; Jugés apres cela ; si vous luy deuez des larmes, & si ie luy puis donner de legitimes loüanges : Commençons par son illustre naissance.

Il n'y a rien dans la nature de si caché que l'origine des fontaines, ny rien de si obscur dans l'Histoire que la tyge & la souche des anciennes familles ; toutesfois comme l'on juge de la beauté de ces viues sources par le premier bassin qu'elles se forment en sortant des entrailles de la terre, bien que l'on sçache que les veines en sont plus esloignées, aussi reconnoist-on la Nobles-



## H A R A N G V E

se des anciennes Maisons par la premiere marque de grandeur qu'elles font esclater dans l'Histoire, quoy que l'on n'ignore pas qu'elles y sont venuës par degres; mais comme les sources qui naissent sur le haut des montagnes sont communément les plus pures, les plus belles, & les plus merueilleuses; les familles qui prennent leur origine sur le Throsne, sont sans contredit estimées les plus nobles & les plus illustres. C'est sur le Thrône des Ducs & des Comtes de Bourgogne, qu'en montant dans les siecles passés à la faueur de l'Histoire, nous descouvrons la premiere Tyge de l'ancienne Maison DE COLIGNY.

MANASSES premier du nom, qualifié Duc & Comte de Bourgogne, de Chalon & d'Autun, & qui viuoit il y a plus de neuf cens ans; laissa deux de ses fils, GILBERT ET MANASSES, possesseurs de ces deux grandes Prouinces; Gilbert espousa la sœur de Raoul Roy de France, de laquelle il n'eust qu'une fille, qui apporta en mariage le Duché à Otson, frere du Roy Hugues Capet; Le cadet appelé MANASSES second, laissa le Comté à HVGVE son fils aîné, qui n'eût qu'une seule fille mariée à ADELBERT second Duc de Lombardie, & Marquis d'Yurée Roy d'Italie, fils de Beranger second Empereur & Roy d'Italie; par là, le Duché & le Comté de Bourgogne, furent partagés entre la France & les Roys d'Italie par le moyen des filles.

MANASSE troisieme, puisné de Hugues & fils de Manasses second, demeura Comte de Coligny & du pais de Reuermont; Et c'est par luy que cet illustre Sang  
a passé



a passé de pere en fils en droite ligne , iusques à Gaspar Duc de Coligny, & au Marquis de Saligny son Cousin, mort avec luy à l'attaque de Charenton. Mais cette noble source feconde en vertus & en merites, qui de temps en temps a donné des Princes à l'Eglise, des Generaux aux Armées, des Gouverneurs aux Prouinces, & des Officiers à la Couronne, s'est meslée avec toutes les plus nobles Familles ; tantost en les retenant en son sein, tantost en s'y communiquant par les mariages, & par ce flux & reflux d'alliances, a receu & donné de l'éclat, à tout ce qu'il y a de plus grand & de plus esclatant dans l'Europe. Il m'eust fallu plus d'industrie que ie n'en ay receu de la nature, & plus de temps qu'on ne m'en a donné, pour rechercher & recueillir toutes les marques singulieres de grandeur, de cette ancienne Maison ; & il me faudroit plus de loisir que ie n'en ay pour les descrire, quand ie les aurois trouuez. C'est pourquoy ie suis contraint de me seruir de l'inuention des Geographes, qui pour representer le monde en racourcy, marquent vne Ville par vn poinct, les plus grands fleuues par vne ligne, & les Prouinces & les Royaumes par la diuersité des couleurs: Et de vous dire en abregé que la Maison DE COLIGNY est vne des plus grandes, & des plus anciennes du Royaume, qu'elle a cét auantage sur beaucoup d'autres de s'estre alliée dans la Maison Royale il y a plus de six cens ans, & depuis dans celles des Roys d'Italie, des Comtes de Sauoye, de Mascon, de Geneue, & de Champagne, des Dauphins de Viennois, de Forcalquier, de Montagu, puisnés des anciens Ducs de Bourgogne, Princes du



Sang de France; dans les Maisons de Villars, de Vergy, de Saligny Princes de Tarente, de Montmorency, de Laual, d'Entremont, de Ryeux, de Salmes, de Nassaw, de Polignac, d'Amilton, de Vvitemberg, & de plusieurs autres tres-remarquables. Comme les fleuves qui coulent dans nos campagnes, en portant la beauté & l'abondance par tout, en recoiuent aussi le tribut de tous les ruisseaux, & se grossissent à mesure qu'ils s'aprochent de leur centre; Vous diriez que le sang de Coligny, ne s'est respandu dans toutes les Familles de France, que pour joindre leur gloire à la sienne, & que toutes ses vertus esparées s'estoient ramassées dans le deffunt Marechal de Chastillon, pour donner naissance à G A S P A R D U C D E C O L I G N Y, qui deuoit apporter vn nouveau lustre à toute la race.

Je sçay bien, Messieurs, que les auantages que les hommes recoiuent de leur naissance, ne produisent qu'une gloire imparfaite, & ne meritent qu'une foible recommandation parmy les honestes gens: Je confesse qu'il y a bien plus de plaisir, de chercher dans les propres actions d'un homme, les preuues de sa noblesse, que d'esuenter pour cela la poussiere des sepulchres & contreroller toutes les Chartes d'une Prouince; car la noblesse qui tire son origine de la vertu, ne peut se conseruer que par la vertu; ce qu'ont fait nos ayeuls ne nous touche guiere plus, que ce que feront nos descendans, apres la reuolution de quelques siecles, & si nous sommes descheus de leur merite, que nous sert l'esclat de leurs vertus, que pour faire dauantage remarquer nos imperfections? Et



pour le dire en vn mot, c'est produire de mauuais titres de noblesse, que de n'alleguer que des papiers, que des peintures & des Armoiries; Et peut-estre trouuez vous estrange, que demeurant d'accord de ces veritez, ie tire la loüange du DVC DE COLIGNY, d'une source estrangere, en ayant vne preuue continuelle dans le cours de sa vie, & que le pouuant enrichir du trauail de ses propres mains iusques dans les portes de son tombeau, ie le pare d'abord des liurées de ses ayeuls. Mais, Messieurs, auant que de condamner mon procedé, ie vous prie de considerer, que si ie ne deffere pas tout à la Noblesse, au moins ne suis-je pas de l'aduis de ceux qui font gloire de la mespriser, comme si elle estoit peu considerable deuant la Diuinité & deuant les hommes; Il me semble que ce n'est pas vn des moindres presents que les hommes recoiuent de la liberalité de Dieu, & puis que l'experience nous apprend, qu'une illustre Naissance donne presque en vn moment, autant d'auantages qu'une vertu laborieuse en peut acquerir en plusieurs années; Je ne serois pas d'auis, qu'on la mist au nombre des choses indifferetes. En effet qu'est-ce que peut produire la vertu mesme consommée, au jugement des plus sages, que le repos, & la tranquillité d'esprit au dedans; les richesses, les emplois, & les dignitez, au dehors; que peut-elle faire de plus grand que de vous esleuer & de vous faire connoistre; que de vous mettre en estat de faire de grandes & de belles actions, & d'acquerir de la gloire; Et ne sont-ce pas les auantages que vous apporte tout d'un coup la grande naissance; comme le sang en est plus espuré, les in-



clinations d'ordinaire en font meilleures , l'esprit en est plus delié , l'ame plus forte , & la nature en se joüant, luy donne vne tranquillité & vne eslevation , où la vertu ne peut atteindre avec tous ses aduantages , ny avec le secours de la Philosophie. La Naissance illustre & releuée porte avec soy les grandes richesses , qui sont les addoucissements des chagrins de la vie ; les grandes dignitez & les grands emplois , qui sont les aiguillons de la vertu ; Enfin la naissance fait le portrait d'un homme tout d'un coup , & comme vne planche sur laquelle sont grauées toutes les belles actions d'une infinité de grands hommes ; elle imprime dans le sang & sur le front des Nobles , des caracteres d'autorité , qui attirent le respect , l'amour , la soumission , & l'estime de tout le monde , au lieu que la vertu ne forme son portraict que peu à peu , & à diuers coups de pinceau , encore n'est-ce qu'avec des sueurs estranges , & des peines incroyables , encore faut-il perdre beaucoup de forces , & beaucoup d'années , pour atteindre à ses nobles productions , qui se ressentent tousiours de l'âge qui les produit , qui sont chagrines , inquietes , & melancoliques , & qui ne portent leur fruit , que quand on n'est plus en estat de les gouter ; Ne soyons donc pas si iniustes de mespriser la naissance , puis qu'elle donne de si grands auantages ; reconnoissons plustost que c'est un effet de la bonté de Dieu , qui disposant de ses creatures comme bon luy semble , fait naistre les vns sur le Thrône , & les autres dans la poussiere ; & dans l'ordre de la Politique cōme dās l'œconomie du Ciel. Auoüons qu'il y a des Astres qui ne sont plus esclatans que les autres,



tres, que parce qu'il a pleu à la Sageſſe du Seigneur de les faire de la ſorte : Mais confeſſons que ce qu'il y a de plus conſiderable dans vne grande naiſſance , c'eſt qu'elle jette vne certaine impreſſion dans l'ame , & luy impoſe vne bien-heureuſe neceſſité de ne pas degenerer de la vertu de ſes ayeuls ; C'eſt que le Noble void dans ſa famille des lumieres perpetuelles qui ne s'eſloignent iamais ; trouue des Maîtres & des precepteurs domeſtiques qui le ſollicitent perpetuellement à faire des actions, dignes du rang que luy donne ſa naiſſance.

Ce ſont Meſſieurs , les illuſtres auantages que le DVC DE COLIGNY rencontre dans ſa Famille, le ſang d'un grand nombre de braues Heros , s'eſtoit ramasſé dans ſa perſonne, & couloit dans ſes veines ; il auoit quitté tout le marc & toute la lie de l'imperfection pour ne produire que des chef-d'œuvres. De quelque coſté qu'il jettasſt les yeux , il voyoit des exemples d'une vertu conſommée ; il voyoit vn H V M B E R T I. du nom Sire de Coligny & du Pais de Reuermont, ſuiure l'Empereur Conrad III. avec trois de ſes enfans dans la Terreſainte , en l'an 1146. expoſer ſa vie & ſa famille , pour conſeruer à l'Egliſe le Patrimoine de I E S V S - C H R I S T diſſipé par l'inondation des Barbares. En l'an 1202. il voyoit H V G V E S DE COLIGNY employé à la conqueſte de Conſtantinople , choiſy par tous les Princes Chreſtiens pour défendre la ville de Serres contre Ianniza Roy de Bulgarie, & ſceeller par ſa mort les preuues immortelles de ſa fidelité, de ſon courage & de ſon zele. Il voyoit I E A N DE COLIGNY viure, mourir & triompher à la bataille de Nicopolis contre Baiazer ;



I A C Q V E S Comte de Coligny mourant victorieux à la bataille de Rauenne ; & G A S P A R son frere Marechal de France à Acqs , conduisant l'armée de François I. en Guienne ; apres auoir porté la terreur & l'effroy dans l'Italie , aux guerres de Charles VIII. & de Louÿs XII. & dans la Grece au siege de Metelin , contre le Turc , & remply toute la terre de leur renommée ; Il voyoit G A S P A R II. du nom Comte de Coligny victorieux à la bataille de Cerizoles , conquerant dans le Boulonnois , & reuestu des charges de Colonel de l'Infanterie Françoisse & de grand Admiral de France ; F R A N Ç O I S Comte de Coligny son Ayeul , Lieutenant General des armées du Roy Henry IV. à dix-neuf ans , contraindre le Marechal de Danuille son Cousin avec des forces inégales , de leuer le siege de Montpelier ; triompher de la deffaite de cinq cens Gentilshommes commandez par Saueuse , en suite des Barricades de Tours , où il se signala pour la deffence du Roy Henry III. comme aussi au combat d'Arques & au siege de Chartres. Il regardoit son Pere couuert des lauriers qu'il auoit cueillis , en gagnant la fameuse Bataille d'Auain , & conquerant plusieurs places considerables sur les ennemis , en conduisant tant au dehors qu'au dedans du Royaume , onze armées Royales ; & vne infinité d'autres grandes & belles actions , qui ont consacré son nom , & l'ont rendu immortel à la posterité : Et au dessus de tout cela , M O N S E I G N E V R , il auoit l'idée du parfait Heros , dans la personne de vostre Altesse , à qui Dieu sans doute a donné le veritable Genie de la guerre ; l'Histoire ne luy pouuoit fournir que des



essais de courage, mais il en voyoit tous les iours des chef-d'œuvres dans vos actions.

Que pensez - vous Messieurs, que deût faire le Duc de Coligny, apres de si grands & de si beaux exemples ? pensez-vous qu'il peût contempler les faits heroïques de ses ayeuls, sans estre touché d'un aiguillon de gloire ? sans estre piqué du desir de les imiter pour se rendre digne de leur rang ; & pour grossir à ses descendants le nombre des exemples de vertu, qu'il auoit trouuez dans sa Famille ? S'il consultoit les mouuements de son cœur, il sentoit bouillir dans ses veines, le sang des victorieux ; s'il regardoit leurs images, il y voyoit l'idée de la parfaite vertu ; ses Peres en luy donnant la vie, luy auoient donné leurs inclinations, & le faisant heritier de leurs biens, l'ont laissé possesseur de leur nom, de leurs vertus, & de leurs exemples. Si la statuë de Cesar inspiroit la vertu, si son image en frappant les yeux renouuelloit la memoire de ses belles actions, & faisoit naistre dans les cœurs genereux les desirs d'aller à la gloire, par les chemins qu'il auoit tenus, comme dit Seneque ; Si ses statuës de pierre & de bronze eschauffoient l'ame de ceux mesme, qui n'auoient aucune attache à Cesar, ny par les liens du sang, ny par les maximes d'une mesme Religion, ny par les loix d'un mesme pais ; quelle impression pensez-vous que fissent dans le cœur du Duc de Coligny, ces exemples domestiques & paternels ? croyez-vous que l'art du Sculpteur & du Peintre, soit plus puissant que la nature ? que Cesar trouue des imitateurs



chez les Estrangers; & que les COLIGNYs n'en trouvent point dans leur race; Et si l'image de Cesar a fait tant de grands Capitaines, ne doutez point que le sang, la vie, l'image & les exemples de tant de Cefars, ne puissent former vn Heros de leur sang & de leur Famille?

Non Messieurs, vous n'en pouuez douter, puis que vous avez esté tesmoins de ses actions, & vous en ferez conuaincus si vous prenez la peine d'entendre, qu'il a donné à son illustre naissance, vn esclat tout nouveau, par vne vie toute glorieuse.

**L**A Vie de la gloire, c'est proprement la vie de la vertu, qui ne se trouue que dans les ames heroïques; comme il y a differents degrez de vie entre les plantes & les animaux; ou pour parler plus nettement, comme il y a des plantes, où la vie vegetante paroist mieux, que dans les autres, & des animaux, où la vie sensitiue se montre plus esclatante; aussi y a-t'il des hommes dans lesquels la vie raisonnable se fait voir avec plus d'auantage, il y en a de si terrestres & de si brutaux, qu'on a peine d'y reconnoistre la moindre estincelle de raison; Mais il y en a de si bien nais, que vous diriez à voir leur conduite, qu'ils n'ont le corps, que par bien-seance, & dans lequel l'ame fait toutes ses fonctions, comme si elle auoit quitté le marc & la lie de la corruption, & qu'elle fust indépendante de la matiere: ceux-là parmy les spirituels s'appellent les vrais Chrestiens, qui adorent Dieu en esprit & en verité; qui viuent de la Vie de IESVS-

CHRIST,



CHRIST, comme s'il estoit à leur ame, ce que leur ame est à leur corps: & entre les Politiques & les mondains, ce sont ceux que l'on appelle les honnestes gens, qui en toutes leurs actions ne regardent que la gloire; & qui ne se remuent que par deux ressorts, par l'honneur, & par la probité. C'est Messieurs, ce que vous me permettez aujourdhuy d'appeller la vie de gloire.

La nature & la grace en auoient jetté les fondements dans le DVC DE COLIGNY, il les a cultuez avec tout le soing possible, & mesnagez avec vne prudence incroyable. La gloire de la vie despend de trois choses principalement, des attaches de la vie, comme des alliances & des amis; des conditions de la vie, comme des emplois, des charges & des dignités: Et des actions de la vie, parce que la reputation & le repos de la conscience, y sont necessairement attachez. C'est en quoy le DVC DE COLIGNY auoit esté parfaitement heureux, il n'auoit fait que de nobles alliances & de solides amitez; il n'auoit eu que de beaux emplois, il n'a fait que de belles actions.

Puis que l'homme est nay pour la société, & que cette société s'entretient, ou par l'alliance du sang ou par le commerce des amitez; ie ne m'estonne point si les sages de tout temps ont esté tres-delicats au choix des alliances & des amis; & s'ils ont creu, que le meslange du sang par le mariage ne lioit pas seulement les interests; mais qu'il confondoit les inclinations; & que le commerce de la conuersation



des amis, faisoit entr'eux comme vne transfusion d'espris & de mœurs, & que dans l'un & dans l'autre, la gloire des hommes y est attachée; dis-moy quels sont tes amis, & ie te diray qui tu es, disoit vn Philosophe; la femme est la gloire du mary, disoit saint Paul, *uxor gloria viri est.*

Le DVC DE COLIGNY n'eust pas plustost formé le dessein de penser au mariage, qu'il fit vn choix digne de son sang, de son esprit, & de son courage; & quoy que par les reigles du bien, du merite, & de la condition, il peut traiter cette alliance en la maniere accoustumée; il prit des routes toutes extraordinaires; soit que par la destinée des grandes ames, qui ne se plaisent qu'aux choses difficiles, il ne peut s'assujettir aux loix receües; soit que son affection qui n'estoit pas commune ne se peut tenir à des conditions vulgaires; soit enfin que le merite de la personne qu'il auoit choisie estant tres-rare; il n'en creut deuoir acquerir la possession qu'au prix de son amour & de son industrie, & qu'il voulut à l'imitation d'Alexandre, mesler quelque image des fatigues de la guerre aux douceurs de son mariage: tant y a qu'il fit vne alliance qui portant l'honneur & la vertu dans sa Famille, la remplit de toute sorte de benedictions.

Dittes-moy Messieurs, s'il vous plaist, s'il estoit iudicieux dans le choix de ses amis; ou s'il estoit heureux à les rencontrer; ie n'en scaurois prendre de plus sinceres, ny de plus fidelles tesmoins que vous-mesme. Ce torrent de larmes qu'il a tiré de vos yeux;



ce fleuve de louanges, qui a coulé de vos bouches apres sa mort, sont des marques asseurées qu'il auoit des amis; Les Iuifs iugerent sainement que I E S V S-CHRIST aymoît le Lazare, parce qu'ils le veirent pleurer sur son tombeau, *dixerunt Iudæi ecce quomodo amabat eum.* Et cette approbation vniuerselle qu'on luy a donnée dans tous les païs où il s'est monstre, & qu'il a arraché mesme de la bouche de ses propres ennemis, est vne preuue conuincante qu'il estoit veritablement aymable.

Il l'estoit sans doute Monseigneur, puis que vous l'auiez iugé digne de vostre amitié: Si-tost que les merites eurent gagné vostre estime, vous l'honorastes de vostre affection: le sang de Coligny, si souuent meslé avec le sang de France, & de Montmorency, fit naistre cétte inclination, que la douceur de ses mœurs, la beauté de son esprit, & la fidelité de ses seruices, auoient tousiours entretenüe; vous l'estimastes digne de tous les plus grands emplois, parce que vous l'auiez trouué digne, d'auoir part en vostre cœur, qui ne sçauroit s'appliquer qu'à de grands sujets: vostre amitié Monseigneur, luy fut pendant sa vie, vtile, agreable, & glorieuse, & pour luy en donner des preuues dignes de vostre inuincible courage, vous le mistes en estat de vaincre avec vous, & voulustes luy faire part de la gloire, que vous auiez esté cueillir à la teste de tous nos bataillons & de tous nos escadrons, dans la fameuse bataille de Lens. En cela Monseigneur, les sentiments de l'amitié furent plus forts, que la passion de la gloire, & j'oze dire que c'est



en quoy vous n'avez pas seulement surpassé tous les Conquerants de l'antiquité ; mais que vous vous estes surmonté vous-mesme ; ces grands Heros partageoient les despoüilles de l'Ennemy entre les soldats ; mais ils se reseruoient toute la gloire des bons succez , comme vn bien qui leur appartenoit legitimement ; Vostre Altesse laissant toutes les despoüilles de l'Ennemy à la discretion du soldat , voulut faire part de la gloire aux Chefs, & la distribuer magnifiquement apres l'auoir iustement gagnée : Et parce que le Duc DE COLIGNY l'auoit portée iusques à vous ; dans le fort de la meüe , vous luy voulustes rendre prodigalement apres le combat ; & l'enrichir d'vn bien qui vous appartenoit , parce seulement qu'il vous auoit aydé à l'acquiescer : vous dites hautement , & vous l'avez souuent reiteré , qu'il n'y auoit rien dans le Royaume au dessus des merites du Duc de Coligny ; que vous auez voulu Couronner de gloire par vostre approbation , quand vostre puissance a esté empeschée par sa mort precipitée de le faire combler de bien-faits , & de luy faire posseder les honneurs qui luy estoient si legitimement deus.

Mais reuenons à ses emplois & à ses charges , qui sont les caracteres de l'autorité du Prince , & des occasions de gloire pour les sujets. Ce n'est pas pour estre chargez de titres , de dignitez & d'emplois , que les hommes doiuent estre plus estimez des sages , bien que se soit des Throsnes de gloire pour les belles ames , se sont pour les effeminez des theatres d'infamie & de deshonneur ; la veritable gloire ne consiste donc pas à les recevoir ;



voir, car les plus imbecilles en sont capables : Mais elle consiste à les bien faire valoir, à ne se point laisser accabler sous le poids de la charge, & sous le faix de la dignité; à sçauoir mesnager & remuer adroitement la puissance qu'on a receüe. Il ne faut pas que la charge donne tout le lustre & tout l'esclat à celuy qui la possède, il faut que l'homme anime sa charge, & se rende recommandable par sa propre vertu.

Le Duc DE COLIGNY est entré dans toutes les Charges par la porte de la Victoire, & a cōtraint la Fortune de les luy donner, deuant le temps. Dans la Hollande, où il commença de faire la guerre, il fut Mestre de Camp d'un Regiment d'Infanterie, Capitaine d'une Compagnie de Caualerie, & puis enfin General des troupes Françoises. En France il eut la conduite du Regiment de Piedmont, apres la bataille de Sedan. Au siege de Thionville on le fit Marechal de Camp, bien qu'il n'eust alors que vingt & deux ans; mais sa vertu & son experience auoient surpassé la force de son aage. En Catalogne il commanda la Caualerie-legere, & fut Lieutenant General des armées du Roy dans la Flandre à la derniere Campagne; tellement que l'on peut dire avec le Sage, *consummatus in breui, expleuit tempora multa*, qu'en peu de iours, il a remply plusieurs années; que comme si son courage n'auoit peu estre arresté, par tous les obstacles qui se rencontrent, dans le chemin de la gloire, il estoit paruenue presque en vn instant aux plus grandes charges de l'armée, quoy qu'il n'y fust pas esleué, par le coup de quelque aueugle fortune, mais qu'il y fust monté par les degrez du merite. Ce

n'est pas pourtant ce que ie trouue de plus glorieux dans sa vie ; ie vous ay desia dit que les charges , peuuent estre le partage des lasches , aussi-bien que des courageux , & que souuent la fortune prostituë les graces aux indignes. Mais sçauiez-vous ce que i'estime le plus dans le D<sup>U</sup>C DE COLIGNY , & ce que i'y trouue de plus remarquable ; C'est qu'il sçauoit honorer tous ses employs , & animer toutes ses charges , c'est qu'il sçauoit mesnager vtilement ce rayon de puissance Souueraine. Et si vous voulez sçauoir , comme il les a dignement possedées , escoutez ce qu'il a fait ? aussi-bien ne connoist-on l'arbre que par les fruiçts , dit l'Euangile , ny l'homme que par les œuures.

Mais Messieurs , que vay-je faire ? qu'attendez-vous de moy ? croyez - vous que j'entreprenne de conter toutes ses belles actions ; il faudroit que ie sceusse le nombre des heures , qu'il s'est trouué aux occasions de la guerre. Pensez-vous que ie veüille mesme , vous représenter celles qui ont le plus esclatté dans le cours de sa vie ? Et que le prenant au siege de Reinberg , qui fut son coup d'essay , sous le feu Prince d'Orange son Cousin ; ie le conduise par les sieges , d'Iury , de Damuilliers , de Saint - Omer , de Ranthy , du Castelet & d'Arras , ( où il gaigna le fort de Rantzau que les ennemis auoient emporté de force , & receut ses premieres blessures ) iusques à la bataille de Sedan , où par vn effort de sa prudente conduite & de son inuincible courage , il desgagea le Mareschal de Chastillon son Pere qui commandoit l'Armée , d'entre les mains de l'ennemy , sauuant ainsi heureusement la liberté à celuy qui luy auoit



donné la vie ; Et prenant de sa main la clef de la victoire , hereditaire à la Maison DE COLIGNY , pour la porter dans toutes les occasions de la guerre , où il se trouueroit à l'auenir ? Comment voudriez-vous que ie le suiuisse aux sieges de Thionville , de Lannoy , de Courtray , de Mardik , de Dunkerque , d'Ypre , & à la bataille de Lens , iusques à l'attaque de Charenton , où il receut le coup de la mort , apres auoir frappé à la teste de nos troupes le coup de la victoire ? Non Messieurs , ie n'entreprend pas de les exprimer , ie les marque seulement pour en réueiller la memoire ; vous en auez esté la plus part les spectateurs , & ie courrois fortune de ne vous faire que de mauuais pourtraits de ses excellents originaux , qui ne doiuent paroistre que comme sortis de la main du Maistre ; car le discours n'est pas comme la peinture , qui fait voir en vn instant ce qui s'est fait en plusieurs siecles , & en differents endroits ; il ne montre les choses que piece à piece , par lambeaux , & à diuerses reprises. Tout ce que ie puis faire , Messieurs , c'est d'en rechercher la source , & de voir par quels ressorts , cette ame si tranquille dans le commerce de la vie Civile , estoit si forte & si vigoureuse dans les occasions de la guerre.

Certes , Messieurs , il faut auoüer que les grandes ames , ne scauroient jamais rien faire paroistre de mediocre ; de quelque sorte qu'elles s'expliquent , soit par les actions , soit par les paroles , il faut tousiours qu'elles y jettent vne impression remarquable de grandeur qui les fait admirer de tout le monde ; cette grandeur d'ame paroist mesme dans les plus petites actions , aussi-bien

que dans les plus grandes , dans les plus sombres aussi-bien que dans les plus esclatantes , parce que les moindres actions sont tousiours assorties à la iuste proportion que la prudence requiert ; ie crois mesme que l'on reconnoist mieux la portée de l'Ame dans les actions communes que dans les plus extraordinaires , parce qu'en celles-là , l'ame se desploye sans art & sans preparatifs ; elle paroist dans sa naïue simplicité ; au lieu que dans celle-cy elle s'estudie & se pare , elle se farde & se desguise , pour faire vn grand effort , apres lequel elle se repose. Et c'est ce qui faisoit dire à vn ancien Orateur parlant à Trajan , qu'il le trouuoit aussi grand , quand il estoit descendu de son throsne pour se communiquer à son peuple , que lors qu'il y estoit esleué pour prononcer des Edits , & faire des Ordonnances.

L'on ma dit vne chose toute pareille du DVC DE COLIGNY , la vertu qui s'estoit renduë maistresse de son cœur & de son esprit , l'auoit tellement préparé à toutes les fonctions de la vie humaine , qu'on eust dit qu'il estoit nay pour toutes les choses qu'il entreprenoit ; en cela il imitoit le procedé de nostre Dieu , quand il fait Iustice , vous diriez qu'il a banny toutes les autres vertus , bien qu'elles ne le quittent jamais. Et quand il fait misericorde , l'on diroit qu'il a oublié les reigles de la Iustice. Ainsi quand le DVC DE COLIGNY estoit à la guerre , vous eussiez dit qu'il ne respiroit que le sang & le carnage ; & lors qu'il estoit sorty du combat , il estoit doux , paisible , & complaisant à tout le monde ; ou bien plustost disons qu'ayant receu de Dieu la semence de toutes les vertus , il les auoit toutes cultiuées ; il les  
auoit



auoit enchainées de telle sorte, qu'il les faisoit agir selon les mouuements de son esprit : on n'eût sceu dire dans le progrez de sa vie, voila vne action de prudence, en voila vne de justice ; Celle-là de vaillance ; celle-là d'humanité ; celle-là de douceur ; celle-là de magnificence, mais tout ce qu'il faisoit sembloit estre méllé & composé de toutes les vertus ensemble, *decerpbat summitates ex singulis virtutibus* ; Et comme le Sage des Stoïques, il n'agissoit iamais qu'il ne les fist agir toutes ensemble ; pour former le tableau de sa vie, il en sçauoit mesler industrieusement toutes les couleurs, il les faisoit regner alternatiuement.

Messieurs ; ne vous y trompez pas, il n'y a que la seule vertu, qui puisse faire les grands Heros, quelque autorité, quelque puissance qu'un homme possede, il est petit, s'il est vitieux, ostez luy la vertu vous le trouuerez petit en toutes choses. Il est petit en ses dons, car il est auare ; il est petit en ses trauaux, parce qu'il est delicat ; il est petit en sa Religion enuers Dieu, parce qu'il est superstitieux ; il est petit enuers les bons, parce qu'il est enuieux ; il est petit entre les hommes, car il est lasche ; il est petit entre les femmes, à cause qu'il est vitieux, Et si la fortune l'esleue à quelque eminente dignité, ce n'est que pour le faire paroistre plus petit, pour le descourir, pour le descrier, & pour le deshonorer dauantage.

Mais Messieurs, quoy que les vertus que le D V C DE COLIGNY auoit acquises, fussent grandes deuant les hommes ; elles estoient nulles deuant Dieu, tandis qu'il a vescu dans l'erreur ; il n'y a point de ver-

tu parfaite, dit saint Augustin, sans le Christianisme, & le Christianisme est vne erreur, s'il est meslé d'heresie, & de superstition; Le Christianisme anime, embellit & fortifie toutes les vertus; il leur donne l'esclat, le lustre, & le merite; c'est le dernier trait qu'il faut adjouster à la vertu Morale pour la rendre parfaite; Toutes les vertus du DVC DE COLIGNY estoient esclaves, tandis que son esprit estoit dans l'heresie de Calvin; Et certes ie ne mets pas sa conuersion au nombre de ses actions vulgaires; ie la mets au nombre des plus esclatantes, soit qu'on la iuge par les maximes de l'Euangile, soit qu'on la mesure aux reigles de la prudence mondaine. Et s'il estoit en estat de nous respondre, & que vous luy demandassiez, laquelle de toutes les actions de sa vie luy fut la plus difficile, il respondroit ie m'assure que ce fut celle-là. Il nous diroit sans doute qu'il n'eût jamais tant de peine à vaincre ses ennemis qu'à se vaincre soy-mesme, & qu'il n'a jamais tant trauaillé à surmonter ses passions, qu'à assujettir son esprit. Le sang des COLIGNYs autrefois si zélé à la cause de l'Eglise, qui auoit esté porter iusques dans l'Orient les marques de sa pieté, s'estoit departy depuis quelque temps de son obeïssance; cette noble source s'estoit escartée de son propre canal, & ces genereux Guerriers par vn faux zele de la Loy destruisoient veritablement la Loy. *Zelo legis impugnabant legem*; Dieu frappa le cœur du DVC DE COLIGNY, & luy inspira de ramener ces ruisseaux à l'Eglise Romaine, comme à la mere des fides. Mais bon Dieu, que de difficultez à surmon-



ter, & que d'obstacles à vaincre; il faut renoncer à ses interets, surmonter la mauuaise honte, se preparer à la calomnie, estouffer vn million de scrupules qui naissent dans ce changement de Religion, & choquer les inclinations, les conseils, & les volonteze d'un Pere iudicieux & d'une sage Mere, sans violer pourtant le respect ny l'obeissance, que Dieu commande aux enfans de rendre à leurs parens.

Le DVC DE COLIGNY l'entreprend avec prudence, & l'execute avec courage. C'est icy sans doute où il eût besoin de toutes les forces de son esprit, de toutes les graces & de toutes les vertus du Ciel. S'il n'eût fallu que vaincre des ennemis estrangers, il luy eut esté facile, il y estoit tout accoustumé; son seul nom estoit capable de leur donner l'espouuante; mais il falloit se vaincre soy-mesme, & trouuer en soy-mesme vne partie foible; il n'y en auoit point. En quoy certes le combat estoit plus dange-reux, & par consequent la victoire plus glorieuse; il auoit soigneusement disposé son holocauste, à l'imitation d'Elie, il s'estoit préparé de longue-main; il auoit conserué de son salut, & lors qu'il eût inuoké le secours du Tout-puissant, le feu descendit du Ciel, deuora les holocaustes & les victimes, & d'un heretique en fit vn Catholique tres-zelé: car c'est vne remarque qu'il faut faire à la confusion de ceux qui ont tousiours esté nourris dans la veritable Eglise; qu'ils ont moins de Religion que les nouueaux conuertis; à mon auis, parce que la Religion n'est aymable qu'à ceux qui la connoissent, & que les nouueaux con-

uertis ayant esté obligez de la connoistre , se trouuent comme necessités à l'aymer , & par consequent à la pratiquer avec plus de fidelité. Sa conuersion luy acquist beaucoup de gloire deuant Dieu & deuant les hommes , à ce coup toutes ses vertus receurent vne nouvelle force ; & bien qu'auparauant elles ne luy peussent acquerir qu'une gloire passagere : elles commencerent deslors à luy acquerir vne gloire d'immortalité. Tellement qu'à suiure tout le cours de sa vie , on la trouue si pleine & si remplie de grandes actions , que l'on peut dire avec verité , *Consummarus in breui expleuit tempora multa* , qu'elle a esté terminée en peu de iours ; mais qu'en peu de iours , il a fait de grandes actions qu'il a terminées par vne mort veritablement Chrestienne & glorieuse.

**C'**EST apres la mort qu'il faut porter iugement de l'homme , pendant le cours de sa vie , ses desseins sont cachés , toutes ses actions sont equiuoques , son courage n'est qu'esbauché ; mais apres sa mort , tout paroist à nud & à descouuert : *Et in fine hominis denudatio operum illius* ; Ses œuvres sont exposées sans déguisement , l'on a donné les derniers traits au tableau ; il est acheué , & parce que la mort est la derniere action de la vie , c'est par la mort qu'il faut iuger de toute la vie.

Je consents , Messieurs , que nous iugions par là , des merites du Duc de COLIGNY , parce qu'en verité il a terminé vne vie glorieuse , par vne mort veritablement Chrestienne ; & par consequent , il a rehaussé



haussée par ses derniers traits tout l'esclat & tout le lustre de ses belles actions ; Et si sa mort vous semble precipitée, parce que sa vie a esté fort courte, & qu'un funeste coup l'a rayé dans la fleur de son aage, dans le printemps de sa fortune, avant qu'il ait eue le loisir de cueillir les fruits de ses merites : Permettez-moy de vous dire, que pour estre trop avancée selon vostre iugement, elle n'en est pas moins parfaite au iugement de Dieu : *Iustus si morte præoccupatus fuerit in refrigerio erit.* Ne regardons pas quand il est mort, ce n'est pas vne chose de grande consequence ; mais examinons comme il est mort ; mourir tost ou tard, dit Seneque, n'est pas considerable, *citò vel tardè mori ad rem non pertinet bene vel male mori hoc ad rem pertinet* ; mais mourir bien, ou mourir mal, c'est ce qui decide tout, & c'est la plus grande des affaires humaines.

En effet, vous vous trompez Messieurs, si vous croyez que la plus longue vie soit la meilleure, ce n'est pas celuy qui paroist le plus long-temps sur le Theatre qu'on estime le meilleur Acteur, c'est celuy qui joie le mieux son personnage. Si la vie est vne guerre continuelle, comme dit le patient Iob, celuy-là n'est-il pas le plus heureux qui en sort le plustost par vne signalée victoire ; si c'est vn enchainement de miseres & de disgraces, croyez-vous que le sage en puisse demander la durée ? & si c'est vne prison dans laquelle nous sommes enchainez, comme parle l'Apotre ; ne croyez-vous pas qu'on nous oblige quand on nous ouvre la porte de bonne-heure ? Ce sont ses amis que Dieu appelle le plustost, au sentiment de

l'Eſcriture ; Et au iugement des doctes , la vie des Heros & des demy-Dieux , ne fut iamais plus longue , parce diſent-ils , que Iupiter ne permet pas que ſes amis tombent dans vne foible & ennuyeuſe vieill'eſſe ; & apres tout , celuy n'a-t'il pas aſſez veſcu , qui a veſcu tout ce qu'il deuoit viure ? C'eſt pour auoir bien employé le temps qu'on merite loüange ; & qu'eſt-ce que la plus longue vie des hommes , qu'un petit poinct , ſi vous le comparez à l'Eternité.

Sur ce fondement , ne concluons rien au deſauantage du Duc DE COLIGNY , ſi nous le voyons emporter dans la fleur de ſon aage , diſons au contraire , qu'il luy eſt auantageux d'eſtre ſorty de ce monde , puis qu'il en eſt ſorty par la porte de la gloire , mourant genereuſement pour le ſeruice de ſon Prince ; & par la porte du ſalut , mourant Chreſtiennement en conſacrant ſa vie à I E S V S C H R I S T : diſons avec le Sage ce que nous auons deſia dit , que *conſummatuſ in breui* , *expleuit tempora multa* , qu'en peu de iours il a plus veſcu , que les autres en pluſieurs années ; & qu'il falloir bien que Dieu cherit ſon ame , puis qu'il ſ'eſt haſté de la retirer de cette region de mort & de cet abyſme de deſolation & de crimes. Qui ſe peut plaindre que l'on l'ait tiré de l'embrazement de la concupiſcence , qu'on l'ait ſauué du naufrage & de la tempeſte ? Il eſt mort dans l'ardeur de la ieuneſſe ; c'eſt la fortune des Heros ; il en a fait les actions ; c'eſt le deſtin des puiffans de la terre , dit l'Eſcriture , *Omnis potentatuſ vita breuiſ* , il eſtoit ſorty du ſang des Roys , quelle merueille ſ'il en reſſent l'impreſſion. Apres



tout, disons de nostre Duc, ce que saint Ambroise disoit de l'Empereur Theodoze, *perfecta est atas ubi est perfecta virtus*, l'aage est parfaite quand la vertu est consommée. I'atteste vostre conscience, Messieurs, vous qui vivez presque tousiours entre les bras de la mort, pensez-vous, qu'une pareille à celle du Duc de Coligny, doive estre jugée malheureuse? ou plustost ne la jugez-vous pas digne d'enuie, selon toutes vos maximes politiques & militaires? mourir les armes à la main pour deffendre l'autorité de son Prince, n'est-ce pas la plus forte passion des ames les plus nobles? le DUC DE COLIGNY est mort de la sorte. Mourir apres avoir triomphé, tout chargé de Palmes, & tout couronné de Lauriers, & marquer le dernier iour de sa vie par une glorieuse victoire, n'est-ce pas l'ambition de tous les grands Capitaines?

Le Duc DE COLIGNY est mort de cette façon, mourir durant vn concert de loüanges; dans l'acclamations publique, faisant couler les larmes des yeux du Roy, de la Reyne, des Princes, des Princesses, de tous les grands de l'Armée & du Royaume, regreté de tous les soldats, pleuré de tous les peuples de l'un & de l'autre party, n'est-ce pas le desir de toutes les grandes ames? le DUC DE COLIGNY est mort de cette maniere. Helas Messieurs, combien y en a-t'il, à qui la vie est donnée comme en punition de leurs crimes, qui se sauvent des tremblemens de terre, des ruïnes de quelques grands edifices, qui ont escrazé des millions de personnes, pour lesquels il semble que toutes les armes du Ciel ont eu de la connoissance & de l'adresse pour se

destourner de leur teste, & tesmoigner par le soing de l'esuiter, qu'ils ont eu commandement exprés de les conseruer au milieu de tout vn monde perissant : qui se sauuent d'un embrasement, & qui trouuent leur salut dans la tempeste, pour estre exposez dans la bonace à la furie de leur desespoir ; qui s'arrachent d'entre les bras d'une vie glorieuse, pour se conseruer quelques momens d'une malheureuse vie, qui doit finir par vne tragedie toute sanglante ; Croyez-vous ceux-là heureux Messieurs, parce qu'estant ieunes, ils ont esuité la mort ? ou bien plustost ne les estimez - vous pas malheureux, d'auoir conserué avec infamie, vne vie qu'ils pouuoient perdre avec honneur ? Desabusons-nous Messieurs, & n'estimons la vie que ce qu'elle vaut, destrompons nostre esprit, espurons nostre imagination, arrestons ses troubles ; & disons avec Seneque, que ceux-là l'estiment qui ne la connoissent pas, car personne ne la receuroit, si l'on ne la donnoit qu'à des bons qui la connoissent. Voila ce me semble vne raisonnable consolation, pour les mondains, mais voicy vn grand subiet de consolation pour les Chrestiens.

Si-tost que le Duc DE COLIGNY, se sentit blessé, il creut que le coup estoit mortel, & apres auoir dit quelques paroles aux soldats pour leur donner courage, d'acheuer glorieusement, ce qu'ils auoient si genereusement commencé ; apres auoir entretenu quelques momens ses amis & ses domestiques ; soit pour disposer de ses affaires, soit pour exprimer la fidelité de son affection ; il se resolut de destourner entierement toutes les pensées du monde, pour employer le peu de temps



temps qui luy restoit aux affaires de son salut ; si bien que deslors il acheua de viure au monde, pour ne viure deormais, & ne mourir qu'en I E S V S - C H R I S T.

C'est icy Messieurs, où ie vous coniure de redoubler vostre attention ; c'est sans doute la plus belle partie de sa vie, & la plus vtile pour vous. Il sentit sa mort, & tout incontinent il dit mourons en I E S V S - C H R I S T ; il en fut assuré par la bouche de son Confesseur, sur la deposition des Chirurgiens qui auoient sondé sa playe : Et voyant son ame sur le point de se destacher de son corps, il l'attacha fortement à la volonté de Dieu, *fiat voluntas tua*. Vn jeune homme engagé dans les passions de la jeunesse, attaché au monde par tous les liens les plus forts que l'on se puisse imaginer ; qui auoit l'ame toute pleine des pretentions d'une tres-grande fortune, qui se voyoit à la veille d'estre esleué au plus haut point d'honneur, où pussent aspirer les plus grands hommes dans vn Estat ; entend la nouuelle de sa mort avec vn visage serain & constant, brize tous ses liens, romp toutes ses chaînes, & abandonne toutes ses esperances en vn moment. Certes ce changement est vn coup de la grace toute-puissante de nostre Dieu, *hæc mutatio dextera excelsi*. Il falloit bien qu'il se fust fortement attaché à Dieu, puis qu'il s'est si aisément destaché du monde.

C'est vne chose que l'experience iustifie tous les iours, que dans les approches de la mort l'ame redouble ses forces, & fait reuiure presque toutes ses humeurs, où du moins fait-elle paroistre les plus fortes & les plus enracinées, comme vn flambeau qui multiplie ses rayons en s'esteignant. La Theologie soustient que

c'est aussi le moment auquel le Demon redouble toutes ses forces pour nous perdre ; mais elle nous assure que Dieu plus jaloux de nostre salut que le Demon , n'est desirieux de nostre perte , multiplie ses graces , & les respand avec abondance : si bien que c'est dans ces derniers moments que la grace est aux prises avec la nature ; & que le Demon se met entre-deux pour fortifier la nature contre la grace , & du succez de ce combat despend nostre bon-heur ou nostre mal-heur eternel.

Ceux qui ont esté spectateurs de la mort du Duc DE COLIGNY , nous raportent quelque chose de semblable ; Dieu versa ses graces dans son cœur avec abondance , qui firent renaistre toutes les vertus pour donner la chasse à tous les crimes , & enchaîner toutes ses passions. Il reconnût & le dit plusieurs fois , qu'il n'y auoit que ceux-là d'heureux , qui mouroient en IESVS-CHRIST , *Beati mortui qui in Domino moriuntur* , & il apprit de ses directeurs , que pour mourir en IESVS-CHRIST , il faut viure en IESVS-CHRIST , & que pour y viure , il faut estre destaché de toutes les creatures , pour n'estre lié ny attaché qu'au souuerain Createur. Dieu luy fit la grace de le croire , de le vouloir , & de l'executer , quoy qu'il luy restast trop peu de temps ; sentant que la mort se pressoit de separer son ame de son corps , il voulut separer premierement le péché de l'ame & du corps , puis que l'un & l'autre l'auoient commis ; Il vosmit tous ces pechez par vne Confession generale , reïterée iusques à trois fois ; il



les poussa de son cœur avec ses soupirs, qui estoient les marques de sa douleur; il les arroûsa de ses larmes, & le Prestre par le Sacrement de penitence qu'il luy appliqua, les noya dans le Sang precieux de I E S U S-CHRIST, & les fit consumer & brusser dans les flammes de sa charité; Son cœur ainsi deschargé de ce pesant fardeau par la misericorde de Dieu, fut remply du mespris de cette vie mortelle, & du desir de l'immortalité; Dieu prit la place du monde, Et si pendant sa vie il ne sortoit de sa bouche que des paroles mondaines, à sa mort il ne sort que des paroles diuines: Et si pendant sa vie il ne pensoit qu'à multiplier ses engagements dans le monde; à sa mort il ne songe qu'à rompre ses liens, ne voulant pas laisser faire à la necessité ce qu'il pouuoit faire par sa vertu; Et si pendant sa vie, l'on n'auoit apperceu que des actions d'un sage mondain ou d'un vaillant Capitaine; à sa mort l'on ne void que des œuvres d'un humble Chrestien, & d'un fidelle tres-zelé pour son salut.

Pendant que nous sommes dans cette region de mort, nostre ame est comme suspendue entre le temps & l'eternité, entre les choses temporelles & les eternelles; quand le temporel contrepeze, il emporte l'eternel; & l'ame renonce au Paradis pour les moindres interets; mais lors que l'eternel est plus fort, il enleue facilement le temporel, & elle mesprise & renonce sans peine à toutes les creatures; Dans les derniers momens, l'ame du Duc DE COLIGNY, qui tenoit à la terre, par quantité de chaisnes,

tres-fortes, tres-naturelles & mesme tres-legitimes; (Car outre qu'il laissoit les esperances d'une grande & belle fortune, il perdoit la joye de voir reuiure son nom dans ses enfans, il quittoit vne femme, que l'inclination & la vertu de l'ame luy rendoit encore plus aimable que la beauté du corps, les charmes de l'humeur, & les delices de sa conuersation; il la quittoit sans doute avec violence, car l'on ne quitte qu'avec beaucoup de peine, ce que l'on possede avec beaucoup d'affection, apres l'auoir acquis difficilement,) eut la force cependant comme colée à I E S V S-CHRIST, de rompre tous ces liens, & se mit en estat de ne sentir, de n'aymer & de ne penser qu'en Dieu. *Anima eius immortalitate plena est.* Que cette pensée de l'éternité produit de merueilleux effets! le feu que l'on renferme dans vn Mortier, ou dans vne Bombe, y demeuré enseuely quelque temps, mais quand il vient à esclater, il brise & rompt tout ce qu'il rencontre.

La pensée de l'Eternité est vn feu descendu du Cœur de I E S V S-CHRIST, il demeure long-temps caché dans nos cœurs, & quelquefois pendant nostre vie, il est caché comme le feu des sacrifices dans le puits de Ierusalem; mais quand à l'article de la mort, le Soleil redouble ses rayons, quand I E S V S-CHRIST y allume ses flammes sacrées; pour lors l'on peut dire que le feu brule tout, deuore tout, & fait fondre l'ame comme vne cire, pour la mettre en estat de recevoir l'impression de la Diuinité. C'est ainsi qu'il en auysé avec le Duc DE COLIGNY: Et si

vous



vous demandez la preuue, ie vous diray que ie ne puis iuger de ce qui se passe dans son cœur, que par ce qui sort de sa bouche. Quand le nuage est plein de feu, il l'exhale de toutes parts, par des esclairs qui esblouissent nos yeux; quand le cœur du Duc DE COLIGNY fut animé du feu du saint Esprit, il le fit connoistre aux assistans; il ne pensoit qu'en Dieu, il ne parloit que de Dieu, quand faisant reflexion sur ses propres miseres, il repassoit toutes les actions de sa vie, & quand ses pensées faisoient naistre des paroles sur ses levres, il disoit, he-las ! qu'estois-je hier ? que suis-je aujourd'huy ? que feray-je demain ? Pouuoit-il faire vne plus Chrestienne confession de ses miseres ? quand il consideroit ses amis & ses seruiteurs, tous baignez dans leurs larmes, il leur disoit ; Voyez mes amis, en quel estat ie suis reduit ? profitez au moins de mon exemple ? reconnoissez en ma personne la vanité du monde ? quoy que ie meure jeune, ie n'emporte que la seule douleur de n'auoir pas mieux vescu ? Profitez mes amis de l'estat où vous me voyez, ce qui m'est arriué aujourd'huy vous peut arriuer demain ? Peut-on parler plus vtilement, & avec plus d'edification ? Quand il esleuoit son cœur à Dieu, s'il luy arriuoit de contempler la seuerité de sa Iustice, il s'escrioit, *Ne pronicias me à facie tua Domine*. Seigneur, Seigneur, ne me rejetez point de vostre face ? S'il jettoit ses yeux sur ses infinies misericordes, *redde mihi letitiam salutaris tui*. Seigneur, disoit-il, versez en moy les consolations que vous auez apportées en qualité de Sauueur ? S'il s'entretenoit sur les adorables decrets de sa Prouidence, qui le vouloit faire sortir du monde : Seigneur,

disoit-il, que vostre volonté soit faite, *fiat voluntas tua*. Et si meslant toutes ses pensées, pour seruir de matiere à l'entretien de son esprit, son cœur animé de la grace, luy faisoit pousser ses paroles expressiues de ses plus ardants desirs, *Beati mortui qui in Domino moriuntur*.

En conscience Messieurs, falloit-il pas qu'il fust tout remply de l'Esprit de Dieu, puis que Dieu fait tous les mouuements de son cœur, toutes les pensées de son ame, toutes les paroles de sa bouche: Et n'auois-je pas raison de dire, que son ame estoit embrazée du feu de l'Amour de Dieu, puis que l'on en voyoit de temps en temps sortir les esteincelles, & les flâmes. Et cela estant ainsi, concluons que sa mort a Christianizé toutes ses vertus; quelles les a toutes employées, & qu'il les a toutes faites regner dans les derniers moments de sa vie.

Après cela Messieurs, ie vous laisse à penser si l'on peut desirer quelque chose à la perfection du Duc DE COLIGNY, & si ie n'ay pas raison de vous dire que, *consummatus in breui expleuit tempora multa*. Qu'ayant acheué sa course en peu de temps, il a autant vescu que s'il auoit duré plusieurs années? Peut-on desirer vne naissance plus illustre? peut-on passer vne vie plus glorieuse? peut-on mourir plus Chrestienement? A la mort des grands Capitaines l'on void des ennemis vaincus, des lances brizées, le corps chargé de blessûres, la terre baignée de sang, des trophées d'armes de tous costez, & c'est ce que les guerriers appellent mourir, dans le liët d'honneur. A la mort des Chrestiens, l'on void les biens mesprizez, les honneurs foulez aux pieds, les vo-



luptez terrassées, les vices abbatus, les passions vaincues, les vertus victorieuses, les graces triomphantes, toutes prestes à recevoir la couronne de gloire; & c'est ce qu'on appelle mourir au Seigneur, mourir Chréstiennement. Ces deux nobles circonstances se trouvent heureusement recueillies dans la mort du Duc DE COLIGNY; Quand vous le voyez affronter la mort, au milieu des combats, la recevoir sans crainte & la porter sans effroy, dans la mêlée, confessez que le Duc DE COLIGNY estoit invincible; quand vous le voyez transporté du Camp dans le lit avec vne blessure mortelle, accompagné du premier Prince du Sang, & de quantité d'autres Princes & Seigneurs de la Cour, qui le conduisent à pied iusques dans son logis; & qu'au milieu de ses trophées, il réveille la pensée de son salut, & ne songe qu'à mourir en IESVS-CHRIST; dites que son ame estoit inexpugnable, & destinée pour la félicité. Et quand vous entendrez dire que le Roy pour reconnoistre la fidélité de ses services, considérant qu'il estoit sorti d'un sang si souvent mêlé avec celui des Souverains, & allié presentement à toutes les testes Couronnées de l'Europe, & que pendant sa vie il n'auoit fait que des actions Royales; a voulu travailler luy-mesme à la pompe de ses funérailles, & choisir sa sépulture dans le sepulchre des Roys; dites que iamais sépulture ne fut plus glorieuse; Et quand vous verrez qu'on met son corps aux pieds des Roys; souuenez-vous que c'est pour apprendre à la posterité, que ce priuilege luy est accordé, pour auoir soustenu par sa mort l'au-

thorité Royale ; car c'est au fondement que l'on met d'ordinaire les appuis.

Mais Messieurs , apprenez par le regret qu'il a eu en mourant , de n'auoir pas employé tout son temps au seruice de Dieu , le soing que vous deuez auoir de penser à vostre salut ; que cette Image de deuil entre vtilement dans vostre cœur. N'est-ce pas vne chose estrange , nous voyons tous les iours les mesmes spectacles , & n'en sommes jamais touchez ; tous les iours cette leçon nous est faite , & jamais nous n'en sommes instruits ; il n'y a rien dont nous faisons moins d'estat que de la vie future , bien qu'il n'y ait rien qui nous soit de si grande consequence.

D'où vient ce desordre Messieurs ? si ce n'est ou que vous estes mal persuadez de l'auenir , ou que vous estes trop fortement attachez aux choses presentes ? En conscience Chrestiens , ne faut-il pas que la Foy soit bien petite , en celuy , dans lequel la negligence est si grande ? parlons franchement , si vous preniez tout ce que l'on dit du Paradis , de l'Enfer , & du Purgatoire , pour les champs Elizées , pour les fleuves de Stix & d'Acheron , & les autres contes de l'histoire fabuleuse ; auriez-vous moins de soing pour acquerir le Ciel & pour esuiter l'Enfer ? viuriez-vous d'une autre façon ? Je voys bien que vous auez changé de doctrine , mais non pas de mœurs ; que la Religion de vostre esprit est fondée sur les maximes de l'Euangile ; & que celle de vos mœurs est formée sur l'exemple des Payens ? & qu'en vn mot vous estes mal persuadez de l'autre monde ? Car si vous

croyez



croyez ce que l'Evangile en dit, vous y penseriez d'un autre façon; Et quoy! si les hommes vous promettent quelque chose, que ne faites-vous point pour vous en rendre digne? S'ils vous menacent, que ne faites-vous point pour esuiter le chastiment? Et Dieu dont les paroles sont des Oracles de verité, vous promet un Paradis, vous menace d'un Enfer, & avec tout cela, il ne sçauroit rien emporter sur vous? Il faut sans doute que vous defferiez peu à sa Parole, & que vostre Foy soit estrangement foible, puis que vos œuvres sont si monstrueuses? Dieu n'est point en vous, puisque vous ne le craignez point, *et ubi Deus non timetur nisi ubi non est*, dit le docte Tertulien.

Mais ie voy bien pourquoy vous estes si peu touchez des pensées de l'autre monde; c'est parce que vous estes trop fortement attachez à celuy-cy; vostre ame est tellement enchainée, qu'elle n'a aucune sorte de liberté; & la terre l'occupe tellement, qu'elle ne pense jamais au Ciel. L'on se mocquoit de ce Philosophe, qui à force de regarder le Ciel tomba dans un precipice; sa faute cependant estoit pardonnable, car son corps ne fut blessé, que parce qu'il vouloit esleuer son esprit. N'a-t'on pas plus de sujet de pleindre le sort malheureux de ceux qui perdent le Ciel à force de s'enfoncer dans la terre? O que vous estes insensez! Et quoy, ne sçavez-vous pas que *præterit figura huius mundi*, que tout passe en ce monde avec une extreme viftesse? Ne voyez-vous pas perir tous les iours entre vos mains, les choses que vous croyez les plus asseurées? & pourquoy ne vous desabusez-vous point? Pourquoy faut-il qu'une



vaine esperance flatte eternellement vostre cœur, & infecte tousiours vostre esprit? Ne voyez-vous pas, que le monde vous occupe à des bagatelles? à des sottises? à mille choses inutiles pour entretenir vostre esclavage & vostre seruitude? Au nom de Dieu, Chrestiens, reuenez à vous-mesme! pensez qu'il y a vne Eternité de bon-heur ou de malheur, qui vous attend apres cette vie! que ce qui est arriué à vostre amy, vous peut arriuer tous les iours! & tenez pour maxime, qu'il n'y a rien de si digne d'une Ame veritablement Chrestienne, que de rompre ses chaisnes, que de se mettre en liberté, & que de finir le cours de cette miserable vie; par vne mort qui serue de passage à l'Immortalité bien-heureuse.

F I N.





